



COMMUNICAZIUN A LAS MEDIAS

Erica Bivetti e Gianni Tschenett vegnan undros culs premis da cultura da la Regiun Malögia per l'an 2024

La pittura Erica Bivetti da Samedan vegn undreda cul premi d'arcugnuschtscha da la Regiun Malögia per l'an 2024. Il premi da promoziun da la regiun vain surdo al giuven chantatur Gianni Tschenett da Schlarigna. La surdeda dals premis saro publica e varo lö ils 17 schner 2025 a Schlarigna.

Tenor l'arcumandaziun da la Cumischiun da cultura ho decis la Conferenza presidiela da la Regiun Malögia dad undrer ad Erica Bivetti per sia vasta ouvra artistica e per sias ouvras d'una granda forza expressiva cun ün premi d'arcugnuschtscha da 10'000 francs. Il chantatur Gianni Tschenett chi sto al cumanzamaint da sia carriera artistica vain undro cun ün premi da promoziun da 5'000 francs.

Erica Bivetti (*1950) es naschida e creschida sü a Samedan. Zieva il temp da scoula ho ella fat üna scolaziun scu fliunza a Cuira. Pervi d'una malatia da las arains ho ella pü tard stuvieu banduner sia lavur. Daspö bgers ans es ella fich activa scu pittura. In sieus purtrets ans muossa ella, cu cha'l muond pudess esser unieu in tuot sias culuors e sias variaziuns. Sias lingias da chesas singuleras ed expressivas ans fascineschan e nus ans perdains ill'intensited da las culuors. Che chi's zoppa davous las fatschedas resta il misteri da l'artista. L'ouvra creativa dad Erica Bivetti es gnida distinguida dal 2019 cul Premi d'art da Trogen per artistas cun impedimaints, ma fin uossa nun es quist'ouvra auncha gnida exposta fich suvenz. Il premi d'arcugnuschtscha undrescha l'energia remarchabla dad Erica Bivetti e la motivescha da cuntinuer cun sias activiteds artisticas. Ella ho decis da druver üna part dal premi per publisher, insembel cun la Cumischiun da cultura, ün cudesch da purtrets chi documentescha sia ouvra.

Gianni Tschenett (*2000) es creschieu sü a Schlarigna ed ho fat la scoula media a l'Academia Engiadina. El fo musica daspö sia infanzia ed ho cumanzo già scu giuven a scriver egnas chanzuns. Ils ultims ans s'ho el etablieu scu chantatur independent e scu musicist in diversas bands. Cun egnas cumposiziuns s'ho el pudieu preschanter cun success i'l ram da divers festivals, per exaimpel al Festival da Jazz, e cun Radiotelevisiun Rumantscha ho el registro duos songs rumauntschs. Sper balladas nostalgicas ho el eir cumponieu songs pü critics e politics, per exaimpel ün cul titul «Uorsin» chi tratta da quist cuntschaint Engiadinais chi tuorna zieva ün pêr ans giò la Bassa darcho in patria, ma nu chatta pü üngün lö per abiter. Actuelmaing stüdgia Gianni Tschenett musica da rock e pop a la Scoul'ota da las arts a Turich. Il premi da promoziun al motivescha da perseguiter inavaunt sia via artistica e musicala impromettanta.

La Cumischiun da cultura da la Regiun Malögia ho la lezcha da güdicher dumandas da sustegn per progets culturels. Per quista lavur ho ella defino criteris da promoziun clers e transparaints e las modalitads per inoltrer progets chi sun publichedas sün www.regio-maloja.ch sülla pagina davart la promoziun culturela. Per mauns da la Conferenza presidiela da la Regiun Malögia propuona la Cumischiun da cultura candidatas e candidats per ils premis d'arcugnuschentscha e da promoziun.